

14. august 2026

UKA 2026/255

Inatsisartut Suleriaasianni § 36 malillugu apeqqu-teqaat aallaavigalugu oqallinnissamik imaattumik siunnersuuteqarpunga:

Ilinniarneq, ilinniaqqinneq, sulisitsisunullu ersarissumik piumasaqaateqarnikkut børnehjemmimi sulisut suliatigut piginnaasaqarnerulernissaat qanoq qulakkeersinnaaneripput pillugu, apeqqu-teqaat aallaavigalugu oqallinnissamik siunnersuut.

(Inatsisartunut ilaasortaq Pipaluk Olsen, Demokraatit)

Meeqqat, inuusuttullu børnehjemmimiittut inuiaqatigiinnitsinni ikiortariaanerpaat ilagaat. Amerlasuut sumiginnarneqarneq, toqqissisimannginneq, inuunermilu artornartunik atugaqarneq misigisimavaat. Tamanna pillugu inersimasut isumassuiinnaaratik, aammali inuunerminni ingerlariaqqinnissaminnut ikiorneqarnissaminnut suliatigut piginnaasasassanik piginnaasaqartunik pisariaqartitsipput.

Børnehjemmimi sulineq imaannaanngilaq. Nalinginnaasumik isumassuineruinnaanngilaq. Meeqqat, inuusuttullu assigiinngitsunik qisuariartartut, kingunerlutsitsisimasut, misigissuseqartut, pisariaqartitsisullu sulisut sullissinnaasariaqarpaat. Sinaakkutinik toqqissisimasunik pilersitsisinnaassapput, meeqqap pissusaa paasisinnaassavaat aammalu ineriartortitsineq, atassuteqaatit, siunissarlu siunnerfilimmik suliaqarfigalugit.

Tamanna tunuliaqutaralugu Demokraatit isumaqarput, børnehjemmimi piginnaasat qaffasissussaannik qaffaanissatsinnut piffissanngortoq. Ilinniarsimanatik sulisorpassuit qularnanngitsumik annertuumik, pingaarutilimmillu tunniussisarput. Tamanna nersorneqassaaq. Kisianni meeqqanik, inuusuttunillu eqqugaasimasunik sullissinnermi sulisut attuumassuteqartut amerlanerusut isumaginninnermi perorsaanermik naleqquttumik ilinniarnissaat imaluunniit ilinniaqqinnissaat politikkikkut ersarissumik anguniagaasariaqarpoq. Tunngaviatigut meeqqanik sullissinnermi pitsaassutsip qaffannissaa pineqarpoq.

Perorsaanermik ilinniarnissamut periarfissaqareerpoq, periarfissallu taakku siunnerfeqarnerusumik atorluarneqartariaqarput. Sulisut børnehjemmimi sulisut suliffik qimannagu ilinniakkamik naleqquttumik ilinnialernissaat, ilinniaqqinnissaalluunniit ajornannginnerusariaqarlunilu kajuminnarnerusariaqarpoq.

Demokraatit aamma isumaqarput, sulisitsisut ersarinnerusumik akisussaaffeqartariaqartut. Børnehjemmi sulisunik ilinniarsimanngitsunik atorfinitsitsiguni, sulisoq suliatigut qanoq piginnaasaqarnerulernissaa pilersaarutaasariaqarpoq. Akisussaaffik sulisunut ataasiakkaanut inissinneqaruni naleqqutinnigilaq.

Isumaginninnermi sulisut ilinniarsimasut amigaatigineqartut oqallisigineqakkajuttarpoq. Tamanna piviusumik unammillernarpoq. Kisianni aamma tamanna patsisigerpiarlugu suliassamut immikkut ilinniarsimasut nutaat kajumilersittariaqarpagut, sulisooreersullu kivillugit. Arnat, angutillu. Anguterpassuit



børnehjemmini sulisarput, taakkulu meeqqanut aamma inuusuttunut pingaarutilimmik maligassiuisinnaallutik. Tamanna pillugu angutit amerlanerusut naleqquttumik ilinniagaqalernissaminut periarfissaqarnissaat aamma qulakkeertariaqarparut.

Meeqqat, inuusuttullu børnehjemmimiittut nalaatsornerinnarmik atorfinitsinneqarsimasunik sullinneqassanngillat. Inersimasunit suliatigut sakkussalinnit, perorsaanermik paasisimasalinnik, ulluinnarnilu meerarpassuarnut toqqissisimannginnermik nalaatsereersimasunut allanngujaassusermik pilersitsisinnaasunik sullissisoqassapput.

Meeqqat, inuusuttullu børnehjemmimiittut pitsaanerpaamik tapersorsorneqarnissaasa qulakkeernissaanut ileqqorissaarnikkut, politikkikkullu pisussaaffeqarpugut. Tamanna pillugu qanoq ersarissunik piumasaaqateqarsinnaanersugut, ilinniarnissamut qanoq pitsaanerusumik aqqutissiuussisinnaanersugut, suliaqarfimmilu suliatigut piginnaasanik qanoq qaffaasinnaanersugut Inatsisartut eqqartortariaqarpaat.

Tamanna pillugu Inatsisartut, Naalakkersuisullu tulluittumi apeqqutitut isummissasut kissaatigaara:

- Børnehjemmimi sulisut amerlanerusut isumaginninnermi perorsaanikkut naleqquttumik ilinniarnissaat imaluunniit ilinniqaqqinnissaat qanoq qulakkeersinnaavarput?
- Sulisut ilinniarsimanngitsut ilinniarnissaannut pilersaarusiornissaannik børnehjemmimi sulisitsisut pisussaaffilerneqartariaqarpat?
- Perorsaanermik ilinniartut aqqutigalugu periarfissat, børnehjemmimi sulisooreersunut qanoq pitsaanerpaamik atorluarneqarsinnaappat?
- Meeqqat, inuusuttullu inersimasunit suliatigut piginnaasaqarluarnerusunik patajaatsunik sullissisoqaqqullugit arnat, angutillu børnehjemmimi qanoq pigiinnarsinnaallugillu piginnaanngorsarsinnaavagut?

Meerartatsinnut, inuusuttatsinnullu ikiortariaanerpaat ilagisaannut inuiaqatigiittut isumassuinitinni pitsaassuseq tunngaviusumik pineqarpoq. Meeqqat imminnut ikiuerusussuseqartunik, ingerlariaqqinnissaminnullu suliatigut sakkussanik sakkussalinnik sulisoqarsinnaatitaapput.

Sammissaq manna pingaarutilik pillugu partiit sinnerisa, Naalakkersuisullu isumaat tusassallugit qilanaaraara.